

UMURWA W'UBWENGE



Ndahiriye I Kiruri ku ntebe y'abasizi
Ku ndaro y'Abakuru na Nyirarumaga
Rumaga rwanjye umbere umugabo

Simpangaye Umurwa-kambere
Ubikira intore y'intambwe ndende
Ijabiro ryereye Rudasumbwa.

Ariko nanjye abandi bana
Bajye bandebera ku birenge!

Yego ugira igisozi cya Ntora
Cyabikiriye Cyirima
Ukagira Rutunga rw'Ibigabiro
Na Muhazi ihaza inyambo.

Ariko nanjye abandi bana
Bajye bandebera ku birenge!

Simpangara simparira rwose
Niho Gihanga yashimye intango
Na Gasabo ibyara ibindi byaro.
Ibyo byo nta mpaka nta rubanza!

Ariko nanjye abandi bana
Bajye bandebera ku birenge!

Yego mu mpinga ngari ya Muganza
Wirengeye Jari na Nyamweru
Niho duhaha umutima warwo
Ariko nanjye mbarusha Huye!

Umunara w'Induga n'Ubusanza
Igisi igisingizo cya Muhigirwa
Umutware w'Ijuru n'Inyaruguru.

Kandi ujye wibuka n'amateka!
Ibuka Rugambirirakuganza
Agamburuza imbarabara!

Agabira Musheru Benginzage
Uruziramire rukazinga utwarwo
Sibwo Ubungwe bwabaye u Rwanda
Ubuguru bw'epfo bugaca bugufi
Bugasatira ibirenge?

None ngo Kigali ! Igara igana he?

Ibuka abashingwangerero
Ibuka abarinda n'Abarindangwe
Wibuke indirira za Rujugira
Maze ukeze abatware b'Inyaruguru.

Imihigo yabo yaberaga aha!

Kebuka iyo nzovu y'ibigango
Udaharamba uko wiboneye
Utaratorejwe mu Bisumizi!

Wumve Huye n'Ibisi byayo
Umunara w'induga n'Ubusanza
Shema ry'Ubufundu n'Ubunyambiriri.

Iyo urambagira Uburwi n'Indara
Urangamiye imirerwa yayo
Nyakizu na Nyakibanda
Na Kigasari y'Imparabanyi
Urenga Imvejuru n'Ubuhanga
Ukiyirangamiye nk'ukwezi.



UMURWA W'UBWENGE



Umva ibigwi bya Ruhashya na Mara!

Akubutse I Suti kwa Gisurere
Kwa Nyaruzi rwa Haramanga
N'I Bungwe kwa Benginzage
Siho yatereye Ubunyabungo?

Garuka ucyeye Mpandahande
Se wa Ruhande ihanda injiji.
Hajishe imizingo y'inzobere
Mu ngeri zoze z'ubumenyi.

Niyo ntaho y'abanyabwenge
Nta ntiti itahigamba ibigwi.

Butare ni umujyi w'abasirimu
Ukagira icyarabu n'ikizungu
Umwana avukana ikaramu
Kubara abyiga mu minsi igihumbi.

Ingendo zijyayo ni iraha
Horizon na volcano ni indege hasi
Moto yaho ni mudatenguha
N'igare rigenda kuri gahunda.

Ndi isangano nyirantarengwa
Kibeho na Nyungwe umurage w'isi
Umurwa w'Abami n'Amayaga
Kibuye cya Shali n'Utwicarabami
Mpuza Uburundi n'Ubunyabungo

Nutembera Tumba na Ngoma
Uzarare Taba na Karubanda
Utaramirwe n'abasesita
Batebya mu ndimi z'abazungu
Mu kirambi cya Faucon na Ibis.

Uzace ingando mu Bisumizi
Wumve amafu ya Bwanamukari
Upfumbase umwari Sidirida

Nuganzwa n'umusa n'umusemburo
Galileo na Barthos bazinga indarane.

Nusinzira umugondorajosi
Uzabamburwa n'inkende
Zeze nk'inzige mu nzitane za Arboretum
Imisambi ya Rwasave n'inyoni za Mamb
Cyangwa inzogera za Gihindamuyaga.

Umurage wose wa Ngomijana
Uzawusanga mu ngoro yawo
Ku rurembo rw'umurwa ucyeye
Iwabo w'Indatwa n'Indatirwabahizi!

Itorero rikuru rya Mukura
N'amahanga ararihururira
Uzarisanga aho ku rurembo

Mu gikari cy'icyo kirezi
Niho twubakiye abakobwa
Uruhimbira rw'abari ku Karubanda
Mu rubumbiro rwa mutamu.
Ntawe uzabona ku marembo
Nk'abo tubona za Nyamirambo.
Haba na Songa y'ayisumbuye
Itoza intore za Rugira.

Irerero, itorero n'urubohero
Ni ko gati kera Buye ya Butare
Abadahigwa mu bumenyi
Iwabo w'umuco n'abacukumbuzi.



UMURWA W'UBWENGE



Sanga Songa y'inyambo n'ibisabo
Na Rubona rw'ingemu n'ingemwe
Uzahava uhembutse, umwana aboga!

N'ibyeranyanja bimera iwacu
Rwasave na Rwabisemanyi.

Butare Huye Sidirida
Ni icumbi ry'Umwamikazi
N'igicumbi cy'umuco I Rwanda

Nkubito y'Imanzi na murumuna we
Abo ni indatwa z'imbanzakurekera.

Uwiringiyimana na Niyitegeka
Benshi mu ntwari u Rwanda rwivuga
Batorewe i Butare bw'abazungu.

Yemwe na Bihemu byahekuye u Rwanda
Burya nta muryango utagira ikigoryi!
Yabatirijwe I Butare kwa Terebura
Huye na Save zabagariye yose!

Zabyaye Gitara na Kambanda
N'umuganga mubi waguye I Mugunga
Abatabazi yatoje bakamuta ishyanga.

Zareze Rugamba na Kagame
Musoni Saveri na Rumiya
Na Perefe Yohani wahatabariye.

Abatubereye ibigoryi
Twabatoje kuva I buzimu
Urugero rwiza ni Karubanda
Ibando imishinga ibyara ubukungu.

Turi indatwa n'Indatirwabahizi
Umurwa w'ubwenge n'ubumenyi
Umurage ukatubera akabando
Twisunga tujya mbere.

Ukuboza 2024

KAJUGA Jerome
MSC Ibisumizi
Gi Homarts /Huye/ Sovu

